


KŪMBÈNU KWA KISÌGO

KYA KABALILO

 Une ngulonda ukufumusya apa ukuti inyīpúto syīnu syālyāmúligwe, ngomano bo uswe twāli akabalilo kākō une nālyāndīle mu butumigwe, ifyīnja fīngi ifi fikīndilēpo. Une ngabōmbāmo nasiku . . . Uswe itolo tukābagile nukwikasya-pāsi abāndu. Nu kwāga ibīngilo-sya-fibonesyo na filifyōsa ifīngi, bābagile ukuyapo abākufwāna pala pa sala ya butatu, ukwīsusya ubuyo bula lōsa. Abēne āngālī bikufimbilisigwa ukwīgālā ifipata, bakābagile ukubītikisya abēne nkati. Uswe tukābagile ukuya kula mpaka pa yābuhāno-na-ibili. Muketile? Itolo maelifu bikōnelēla ukufuma kulikōsa. Itolo . . .

² Kangi une negile ikilo isyabumalikisyo ihano mu lukomano lwabumalikisyo, kangi itolo nāyēngīle ukusyungutula i Lisyu, kwanda ukusyagania go maka nki i Lisyu lyālī nago. Muketile? Panongwa yakuti, i Lisyu yo Kyala. Muketile? “Ku bwandilo lyalipo i Lisyu, i Lisyu lyālī na Kyala, kangi i Lisyu āli Kyala. Kangi i Lisyu lyapeliigwe ukuya mbili nukwitugasya pakati pitu.”

³ Lilino, Bahiburi 4 āyobīle ikyo, ukuti “I Lisyu lya Kyala lipyasye ukukindapo ukukinda u lūbo lwālūgēnge kubilikosa.” Muketile? “I Lisyu lya Kyala lipyasye ukukindapo ukukinda, kōpe ukulasania pakati pa kifupa, kangi ukutumula, kangi mmanyila-ngāni gwa minogono ga linogono, indumbula.” Muketile? Ikyo kyo iki, i Lisyu lya Kyala.

⁴ Polelo linga kilipo ikyābūpi kūko uswe tubagīle ukwihobola twibene; kangi i Lisyu, Lyēne, ili lyo Kristi, Uyu yo Lisyu, likwisa mwa uswe, nu kumanya-ngāni amīnogōno ga līnogonelo, bo mūmo umwe mukibwēne ikyēne. Muketile? Bo bunyafu buki. Polelo, ukukéta iki Umwene ābombīle kangi injila iyi Umwene atusayile uswe! Kangi polelo i . . .

⁵ Ikyo, une ngwipilika ikyo, ukuyenga ikylene ukusyungutula i Lisyu lila ku kilo sina, itolo unko abāndu bitūgāsye kimyemye, kangi polelo itolo ihobola, kangi u Mbepo Mwikemo ikubakolelaga abandu nu kubomba ifindu panja nkilundilo.

⁶ Kangi polelo, ku namayolo agabumalikisyo, pamusi gwa Ndungu ugu gwakindaga, une ngētīle lumo mwa ngīndi syalubūmbulusyo ingulumba-ukukīnda une ngētīlēmō siku mu America. Muketile? Abene baali . . . Une nātūmile Billy kula na makadi mia yumo, na Gene na mia yumo, kangi Leo na mia yumo, kangi Roy na mia yumo, itolo ayabanisye amakadi gōsa, ukufwana bamia bahano. Kangi polelo ukufuma pāpo

abène bālikētīle i Lisyu ukwēga ubukōlélo, kangi iki Ilyēne lyābagile ukubōmba, polelo ukwitugasya palapala pa Lisyu lila lilino, ukubatwala abene ku kigemo. Kangi une nābabwéne abanyāmbála na bakīkūlu bikusopa ifyakwigemekesya pakwēnda fyābo, na fyosa bo ifyo, nukubumbulusigwa bo abene bakāli nukufika ku kigemo, itolo ukukéta. Muketile? I Lisyu lya Kyala lyābōmbīle lyāsōkīle pānja, pānja ukukīndāmo mula, nu kwīsomeka Lyēne mu Ndumi ihano sila, pamo Indumi sina, mu ndumbula syabo, mpaka abene balitike Ilyene ni ndumbula yabo yosa. Polelo, ikindu kyene iki abene bafimbilisigwaga ukubomba, ko kuya nu luko lumo ulwakukolekesya kunini, muketile, ikindukimo ikingi, kangi kyāli bwanaloli. Kangi itolo mbimbibi bo abène bātikaga i kigemo kila, abène bābūmbulusigwāga palapala pala pa kige- . . . itolo bo bakāli abène ukufika ukukilania i kigemo.

⁷ Une ngusubila, bakundwe apa, umwe mwesa mummenye Nkundwe Ed, Nkundwe Ed Hooper. Bule umwe? Ugwe kufuma ku Arkansas, pási pala? Umwene ályagene . . . Umwene áli na une mfiyabo ifikindane ifya butumígwe bwakubwandilo. Umwēne alinkuti, “Iki kyābonekága ngati kwa tubalilo twaiyolo,” umwēne alinkuti, “akabalilo kāko mūmo abène bālisibīle, ifyīnja ifi fikīndilēpo.”

⁸ Kangi bālipō abāndu aba bāli na mūlu-ga-kansa aba bāli—bāli kila bo *ulo*, bikugomokela, bali kanunu. Mfwamaso, gwamapuli, gwakinunu, u luko losa ulwa findu ifi u Ntwa gwitu ābombīle. Siku nukufimbilisigwa ukupalamasya abandu. I Lisyu likubuka panja ukubomba ikyene.

⁹ Polelo u Ntwa ālimbele une i Ndumi iyi une ngulonda ukuyoba ku kipanga, akabalilo kamo, akabalilo kāko une ngugomokela, nguya nu lusako pamo. Une lōsa nīkolēnie. Lilino une ngufimbilisigwa ukusōkapo kangi, kilabo, ngugūlila u ndindwana uyu ukwisa. Kangi pōpe bo ngāli une nukuya ni kikwāma kyāngu mu nyūmba, ālipo u munduyumo pala. Kangi une ngitugasya pási ukufuma lula, kifuki. Muketile? Une ngabōmba nu kuyoba ku kikolo kyāngu ukufuma pāpo une njīle muno. Muketile? Kangi ikyēne kyo—ikyēne kyo naloliloli lulūsanio. Kangi une ngufimbilisigwa ukusūma isyīnu syōsa sya mwēsa kuli une, nūmwe, ukuti u Ntwa isa kundūla une ukwikolelela mmwanya.

¹⁰ Lilino . . . [Ubuyo busitakandu pa tepi—Nsimbi] Keta unkundwe gwitu apa, naloliloli mbine, alambalele pa kitala iki. Kangi uswe . . .

¹¹ Umunduyumo ikwisa, nkanandi akabalilo kanini, kwa uswe, ukubuka ku Louisville. Une ngulonda umwe mukukumbukila u lwiputo, kāngi, unkikulu unnunu unnini, uyu, umwene akaya ni fyinja kalongo-na-lwēle mbukusi. Umwēne yo mbasa, kangi u ndindwāna gwa Kikristi mu sukulu. Kangi abalindwana abangi

bāyobaga isya umwene, umwe mumenye, balindwana babili, nukubabula abene mumo abene bāli, kyo kiyabo kya bumi nki abene bapōndwāga, kangi mumo abene bikufimbilisigwa ukuya nu bumi ngati bosa ba balindwana. Kangi undindwana yumo abagīle itolo ukwitoga pamwanya pa ikyene. Uyu yumo uyūngi āli nu lwilūmbusyo, kangi umwēne ipilikāga nalōli mbubībi isya ikyēne, kangi alinkūmilisya ukusōkapo, nu kuyōngelēla kubutali kunyuma, kangi ikwilūmbūsyā isya ikyēne. Kangi kubumalikisyo umwene ali nako ukubongotoka kwa bōngo. Kangi abene. . . Umwene ali mbukyūnge bwa basyūtāno. Unna nu gwīse bikwīsa, itolo pabupipi panāndi, ukufuma ku Crandall, Indiana, ukubuka ku nyumba ya busyūtāno iyi kuko abene bikugelaga ukuntuma umwene, ku Madison, kilabo.

¹² Lilino, u—u ndindwana, kukayapo ukubongotoka kwamumbili nu ndindwana. Umwene. . . Kikayapo nakimo, mumbili. Umwene ali mpelelesye nkafu. Loli ikyene kikafu fiyo ukulingania ikyene. Kangi ikyene naloliloli kikabagila ukulinganisigwa. Iki ikyēne kili, u mbepo gwāke ěmbēlile. Muketile? Lilino, ugwe—ugwe kufimbilisigwa ukunkola u mbepo gwake nukuntwala umwene ukugomokesya ku buyo. Muketile? Kilipo. . .

¹³ Mūmo, uswe tukindilīle ukuyoba apa, imilungu minandi igi gikīndīle, pa mūmo fikuti ulubātiko lwa būndu lukubōmbēla. Mūmo fikuti filipo ifyakwīpilikila fihano ifi ugwe kwīngila mu mbili, kangi polelo imibūkāmo mihāno uswe tubāgile ukukikōlēla ikyēne. Imibūkāmo mihano, bo ga—ga mabyēbye, ukwīnogonēla, na fyōsa bo ifyo, uswe tukwīngilila mu mōyo. Kangi polelo akabalilo kāko ugwe kwīngila mu mbepo, yilipo umubūkāmo gumogwēne ntiga, kangi ikyo kyo ukwīsilā mbwīgāne—pagwīmwēne, iki kyo kikwāla ikyēne kunyuma mūno u mūndu āpelīgwe.

¹⁴ Ugwe ubagile ukwambilila Ikyene, pamo ugwe ubagile itolo ukukileka Ikyene kibukege. Ugwe ubagile ukwitikisya Kristi ukuya Mpoki, pamo itolo ndeke Umwene abukege. Kangi ugwe ukāli uli pa Mpiki gula, ugu gumo ugwa Būmi kangi gumo ugwa bufwe. Umundu aligwesa ukuya ābīkīgwe pankyeni pa Mpiki gula, kisita-ikyo Kyala āngali ikuya nsitabugolofu ukumbīka yumo pala, kangi polelo kisita kumpa uyūngi yula ulusako ulufwānafwāne uku—uku sala ikitalusye pamo ikisobi. Kangi gwesa gwa uswe ali nu lusako lula.

¹⁵ Kangi, mu ikyo, u mbepo, uswe tubagile ukubumbulusigwa, pamo uswe tukabagila ukubumbulusigwa. Lilino, ikyene kikaya nongwa yakuti kula kukaya. . . ukuti uswe tukabumbulusigwa ukufwana na Kyala. Uswe tubōmbile. Kabuno u lwitikano lo lusita—kulōngigwa. Kangi Umwēne atalile ūlīle ulubūmbulusyo lwītu. Polelo, ulubūmbulusyo lwītu luli—luli kwa uswe. Ulwēne lo lwītu. Lilino, ikyēne kyo kali uswe twīsa kwēga ububūkāmo *ubu*, ukwītika ikyēne; pamo ububūkāmo *ubu*, itolo ukusita

kwītika ikyēne. Lilino, yilipo itolo injila yimoyene yila iyi uswe tubagile ukwenda mu Kuyapo kwa Kyala.

¹⁶ Lilino, u mwāna uyu, ummogi, u ndīndwāna-mwinake gwa māma gwāke. Une, mwe...O, ālisibīle ukuya yumo mwa balīndwāna-binangu. Umwēne āli nkīkūlu nnini unnunu, āsōkile ukufuma mu kāya kānalōli akāndagilo ka Nazarene, akanyāfu akalīndwāna akanini. Kangi umwene ali nu nnyambala unnunu. Une nummenye umwene, yōpe, naloliloli kanunu, u ndumiana uyu ālyēgīle umwene. Kangi umwene itolo panandi...Abene bikuswila a bāna bala ukumbombela u Ntwa, nu kubabika abene mu sukulu. Kangi abene naloliloli bālīmīkigwe mwa Kristi, komma ukubomba ifindu ifi fisobi. Loli pala ikyene kyābūkīle.

¹⁷ Itolo pa bubongotoke bumo, itolo bo une ndi... nākētīle itolo utubalilo tunini tukīndīlepo, nu kukētēsya kangi ku ndumiana unnini, āli ni kīndu kilakila, katikati. Kangi ku i...Uswe twābūkīle pāsi pala ikilo kimo, kwa Nkundwe Wright, kangi Orville āli itolo—itolo mbubongotoke bōsa. Kangi umwene, umwe mumenye, akabalilo kako umwene ikugela ukumbopesya une ukufuma mu nyumba; ukuya nnunu gwa mwīnāke mūmo Orville na une tuli, itolo nalōli ngati une nābagile ukuya gwīse. Une nābēgīsye u gwīse nu nna, palikimo. Kangi umwene itolo anyelaga mmwanya nu kukūta, “Sokapo apa! Sokapo apa! Sokapo apa!” Muketile?

¹⁸ Lilino, iki uswe twāfimbilisigwe ukubōmba kula kwāli ko kubūka pānja mu lukīndi lwa mbepo nu kukola u mbepo gwa ndumiana yula. Muketile? Ikilūndīko kya busulumanie bwisile ku ndumbula yake innini. Umwene yo nkeke, kangi umwene aaketile fingi. Kangi itolo twālīntwele umwene kulakula ukugomokela ku buyo kūko umwene abagīle ukuya. Umwe muketile? Mmasiku manandi, umwene āli—umwene āli kanunu mosa.

¹⁹ Lilino, ikyo kyo kindu kilakila iki ugwe kufimbilisigwa ukubomba pa iki. Une nkibwene ikyene, kangi une mmenye ukuti ikyene kyo kyabwanaloli. Lōli lilino, itolo...Une—une ngusuma umwe mwēsa ukwīpūta lilino, ukuti—ukuti Kyala isakundula une ukummwaga undīndwana unnini uyu. Panja pa buyo, kuko umwene akamanya kuko umwene aliko, polelo ukuntwala umwene ukugomokela ku buyo bwake. Ububūkāmo bula bukūsa ukwisila mu lwitiko. Muketile, umwene akabagila ukuya nu lwitiko ku mwene. Umwene akamanya kuko umwene aliko, pamo kalikosa. Muketile? Ikyene—ikyene kikufimbilisigwa ukwega ulwitiko lwitu apa.

²⁰ Kangi lilino, mu ikyo, gala amaka ga busyuke bwa Kristi, aga Umwene atupele uswe u lusako. Kula ko kūko, ugwe, mu njila yimoyēne, i Lisyu lya Kyala likulasa untulwanongwa. Kangi Ilyene likufimbilisigwa ukubuka ukukinda ubulumbilili

bwa Lisyu likubuka panja. Fyōbène une nālonidaga ukuyoba akayabo kanini ulubunju ulu bo tukāli ukwiputula ababine. [Ubuyo busitakandu pa tepi—Nsimbi]

²¹ Umwe mukukumbukila i mboniboni, pakaya patali mma, u Ntwa ālimbele une, umwe mumenye, ukufwana ukukéta u Lubafu ulungi? Umwe mukukumbukila ulubunju lula akabalilo kako une nālinganiaga ukufwana nu Lubafu ulungi? Ena, ikyo kyo kyabwanaloli.

²² Kangi i *Lisyu* lya Banyambala Ba Nongwainunu Yosa yifumwīsyē akapango kala, kangi ukubika ikipīcha pa nyuma ya lyāni apa. Kangi akēne kali nako akanini akakwīngisyāmo pāsi apa kūsi, akayabo akanini apa kūsi, kakuyoba isya butumigwe. Iki, iyi yo kalatasi ya kīsu-kyōsa yisīmbigwe mu njobelo nyīngi ingīndāne. Kangi abene bapāgulile i lyāni lyāpankyēni, kangi ikyākwanda, pa mboniboni yila. Muketile?

²³ Kangi une ndinasyo isyēne pamwanya apa, kangi une ngunyonywa umwe āngāli mukusalapo yimoyēne, kangi umwe mubagile ukubala akēne. Kangi ukufyuka... Une ngāmenye balinga aba bikuyaga ukusuluka, a bakundwe, ulubunju ulu. Kangi umwe, polelo, linga umwe mukwāgigwa ukutoligwa kimo, ena, itolo būka ku ofisi. Abēne balinasyo isyēne kula ku ofisi. Kangi abēne batulekile uswe tuli ni kibunganie kya fyēne, ukufwāna: “Umilisyaga ukugūtīla nkyēne.” Muketile? Kangi ikyo kyo kyōsa kili mu ndumbula yāngu. Fyosa ifi une mbagile ukupilika, fyō, “Umilisyaga ukugūtīla nkyeni.” Itolo ukukinda i—i kisōko kula kyo i—i Kisu ikinunupo. Kangi unko uswe tukindilelēge ukuguta mpaka uswe tukwāgāna ni Kīsu kila.

²⁴ Lilino, une ngwinogona abēne bali nalo apa ulusayilo lwa unnini gwa Nkundwe Stricker kangi Kalumbu Stricker. Popāpo ikyo...

²⁵ Balinga aba bikubomba ikyo ukuya lilino, Kalumbu Stricker? [Kalumbu Stricker ikuyoba, “Ntāndatu.”—Nsimbi] Abīnitu banini ntāndatu. Ako ko kanunu akakolo akanini.

²⁶ Kangi popāpo abēne bo... bāli ba misyoni bītu ukukilania mu—mu Africa, lululu ulu, ukugomokéla. Kangi bōsa abāna bābo bo bamogi bīnitu banini. Kangi une mbagile ukumbona uyu yumo ali, yōpe, bo abēne bikukatwāla akēne pamwanya ulubūnju ulu ku bubōmbelo bwalusayilo.

²⁷ Ali kugu Teddy? Teddy, ngimba ugwe ubagile ukwīsa kuno ku piano, itolo iminiti, umwanundumiana? Kangi—kangi unko uswe tuyege nu lwimbo lwitu, ulwimboulunini, umwe mumenye, ulwimbo lula, une ngusubila, uswe tukwimba, *Batwala Abene Nkati*. Ngimba uko kutalasya? “Batwala abene muno ukufuma ku migunda gya mbibi.”

²⁸ Kangi iyo yo, nongwa uswe tukukuba iki, panongwa yakuti uswe, na fyōsa ifi uswe tubagile, abapāpi, ko kutwāla abēne ku lusayilo. Uswe tukubapāgulīla abēne kwa Ntwa nukubatwāla

abène nkati bo abène bakāli bafyēle, ukuti abène balingīsa kuyōnga pānja mu migūnda gila igya butulwanongwa. *Batwala Abene Nkati*. Unko uswe itolo . . . Ngimba umwe mulumenye ulwene, Teddy? Unko uswe itolo twīmbe ilinandi limo ilya ilyēne lilino.

Batwala abene muno, batwala abene muno,
Twala abene nkati ukufuma ku migunda gya
mbibi;
Twala abene. . .

Linga alipo uyūngi yula, fiki, itolo twāla akēne papapa nkyēni.

Twala banini bala kwa Yeso.
Batwala abene muno, batwala abene muno,
Twala abene nkati ukufuma ku migunda gya
mbibi;
Batwala abene muno, batwala abene muno,
Twāla abembēli bala kwa Yeso.

²⁹ Nkundwe Stricker kangi Kalumbu Stricker, une ngusyagania ukuti umwe mumenye iki ulwimbo lula lukusanusya, uku “batwala abene muno,” ukunyonywa kuli mu ndumbula yako, ukugela ukutwala u ntagigwe kwa Yeso. Ugwinu u bōnda unnini, linga akēne kābagile ukufwa bo akēne kākāli ukusayiligwa, pamo kilikyōsa ikingi, akēne kapokigwe, mulimōsa, panongwa yakuti i Lilopa lya Yeso Kristi lyābombile ikyo ku Kalvari. Lōli mu lukūmbusyo lwa bwēndelo Bwāke ubukulumba ubwapakisu, akabalilo kāko Umwēne ālāmbalike amaboko Gāke pa bakeke bala kangi alinkuti, “Baleka abene ukwisa kwa Une,” fyōbène umwe mukuntwalaga u mwāna ulubunju ulu. Kangi ukubīka ulusūbilo mwa uswe, ukuti uswe tubagile ukwīputila ulwīputo lwa lwītīko, kuli unkeke yula, mu lusayilo lwa būmi bwāke kwa Kyala.

³⁰ Ngimba ingamu yake yo fiki? [U tāta ikuyoba, “Marilyn Madge Stricker.”—Nsimbi] Marilyn Madge, Marilyn Madge Stricker. Ngimba akēne kakusi bulebule? [U māma ikuyoba, “Imyēsi kalongo-na-mitatu.”] Imyēsi kalongo-na-mitatu. Apāpīgwe mu Africa, ngimba, uko kotalusya? [“Ena.”] Ena, ngusuma, linga aliko yumo kilabo, akanini kamo aka kali yaga gwa misyoni ukukilania kula, mu migunda kuko umwene āpapīgwe. Kangi u—u mwāna ummogi unnini. Ngimba ugwe kwisaga, Nkundwe Neville?

³¹ Kangi, Marilyn. O, mwe! Une akabalilo kōsa mbaganile abinitu abanini aba. Ngimba uyu akaya mwinitu unnini ummogi uyu? Ngimba ugwe kubombaga bulebule? Ngimba ugwe kubombaga bulebule? Unko uswe twinamisye imitu gyitu. Une ngulonda ugwe, bika amaboko gāko pa mwene.

³² Tāta gwiitu Gwakumwanya, uswe tukutwaala kwa Ugwe unnini Marilyn Madge Stricker, uyu unganigwa u mwāna unnini

uyu āpāpigwe pa migunda ga misyoni, akabalilo kāko u bwīte bwābūkāga nubukafu. Une ngusuma ukuti Ugwe kusayaga u mwāna uyu. Mwi Bangeli, abene batwele kwa Ugwe abanini bo bala. Ugwe gwabikaga amaboko Gāko pamwanya nu kubasaya abēne, ulinkuti, “Baleka abāna abanini bise kwa Une, kangi ukubakānisyaga abēne mma; kabuno u luko ulu lo Kitangalala kya ku Mwanya.”

³³ Unna nu gwīse bikubīka akēne mu ngōngi syītu, umwīsyūgu. Uswe, nu lwītiko, tukufyuka amafyūkilo, kula, ukukabika akene mmaboko Gako, nu lwitiko. Sayaga ubumi bwake. Mpapo umwene ubumi bwake butali, Ntwa. Umwene ali yaga mwana gwa Kyala. Umwene alikubombelaga Ugwe nu ubumi bwake bosa, undisi guligōsa gwa būndu bwāke, ukuya mbombi gwa Kristi. Tupaga ikyene, Tata. Nsaye u gwīse na nna, abakundwe bāke abanini na bakalumbu. Balikulaga mmwanya, bōpe, nukuya kikolo kyalwimiko ku bubombelo bwa Kyala.

³⁴ Tata, uswe tukumpa Marilyn Madge kwa Ugwe, mu Ngamu ya Yeso Kristi, ku bumi bwa bubombelo. Nsaye umwene, kangi ugwise, kangi unna, na baganigwa bake. Kangi abēne baliyaga būmi butali, imyūmi imihobofu mu bubombelo Bwāko. Mu Ngamu ya Yeso. Amen.

³⁵ Kyala akusaye ugwe, Nkundwe Stricker. Kyala akusaye ugwe. Isayo pa nkīkulu unnunu unnini.

Ndaga ugwe, Teddy, ndumiana.

³⁶ Une mbaganile a bāna banini. Bule umwe?

³⁷ Balinga bakāpilikemo siku imboniboni u Ntwa ālimbele une? Unko uswe tukēte amaboko ginu mmwanya, aka siku. Nkundwe Neville, ugwe uli nalyo ilibuku ilinini pala, lumo, lumo ugwe ubagile itolo ukubala ilyēme kuli abēne papapa apa, itolo kuli akabalilo akakōnge pamo tubili. Une ngwitika ikyene. . . Itolo papapa apa, linga ugwe kulonda.

³⁸ [Nkundwe Neville ikubala ukufuma i February 1961 *Lisyu Lya Banyambala Ba Nongwainunu Yosa—Nsimbi*]

[Ulubunju lumo une nālāmbalēle pa kitala kyāngu. Une nāsūmwike itolo ukufuma ku tulo, kangī une nābīkile ifiboko fyāngu kunyuma kwa mutu gwāngu nu kwīhobola nu mutu gwāngu pa pīlo. Polelo une ndinkwanda ukuswiga iki ikyene kisakuyaga bo ku Lubafu ulungi. Une ndinkusyagania ukuti une nikele fiyo ukukindapo sinda gwa bumi bwangu linga une ngwitugasya ukuya nkangale bo bandu bangu, kangī une nālōndāga ukubōmba fīngīpo kwa Ntwa bo ngāli une ukusōkāmo mbūmi ubu.]

[Une ndinkupilika i Lisyu likuyoba: “Ugwe gwe kwānda itolo! Gūta ubwīte! Umilisyaga ukugūtīla!” Bo une ndāmbalēle pala ngwīnogonēla a masyu, une

ndinkwinogona ukuti une itolo ninogonelaga ukuti une nâpîlike i Lisyu. Kângi i Lisyu lyâyobile: “Gûta u bwîte! Unko nduko! Unko nduko!” Ngâli ngwîlâmwa, une nînogonâga ukuti lumo une nâyobile amasyu gala nîmwène. Une ndinkubîka imilomo gyângu pakati pa mino gângu nukukoleléla ikiboko kyângu pamwanya pa ndomo gwângu kangî ndinkupilikisya. I Lisyu lilinkuyoba kangî: “Itolo umilisyaga ukugûtîla! Linga ugwe gwâmenye itoloiki kyo kili kubumalikisyo bwa nsebwe!” Une ndinkufwâna ngupilika ubwîmbilo na masyu ga lwaiyolo, ulwîmbo ulwîsibiligwe:]

[Une nisyukile kangî nsulumenie, kangî une ngulonda ukumbona Yeso,]
 [Une ngulônda ukupilika amabangalaagakukiloboko gala gikukuba,]
 [Ikyêne kibagîle ukwêlusya i njila yângu ni kumasya isyalutênde syôsa;]
 [Ntwa, unko une ngête ukukînda ikisîgo kya kabalilo.]

[Polelo i Lisyu lilâlusîsye: “Ngimba ugwe kulonda ukukêta itolo ukukînda ikisîgo?” Une nâlyamwile: “Ikyene kikundulaga une fiyo!”]

[Iki fyâbonike une ngabagila ukuyoba. Kali une nâli mu mbili pamo panja, pamo kali ikyene kyâli kyakusanuka, une ngamanya, lôli ikyêne kyâli kikîndâne ni mboniboni yiliyôsa une njîlêmo nayo siku. Une nâbagîle ukukêta ubuyo ku iki une nâlyêgîgwe kangî une nâbagîle ukwîbona nîmwène ndâmbalêle kunyuma pamwanya pa kitala kyângu. Une ndinkuti: “Iki kyo kindu kihesya!”]

[Bâlîpo imbalilo ingulumba isya bându kangî abêne bâlîsîle ukubopa ukumbonia une, bikukûta: “O, u nkündwe gwîtu umpala!” Ikyâkwânda bâlîsîle abakîkûlu abakeke, nkabonekelo mu mbwandilo bwa malongo-mabili gâbo, kangî akabalilo kako abene bikûnyûbatila une abene balinkuti: “U nkündwe gwîtu umpala!” Abanyâmbâla abakeke, mbulângàle bwa bûnyâmbâla ubukeke, na mâso gâbo gikumulika bo ndôndwa pa kilo akângîsi, na mîno gabo ukuya mêlu bo sangalabwe, balinkunyûbatila unne, bikuyoba, “U nkündwe gwîtu umpala.”]

[Polelo une ndinkukêtésya ukuti une, nîne, ndinkuya nkeke kangî. Une ndinkwikêta nîmwène pala nu kusanuka nu kukêta kunyuma ku mbili gwângu unkângàle gulâmbalêle pa kitala ni fiboko fyângu kunyuma ku ntu gwângu. Une ndinkuti: “Une ndikupilikisya iki!”]

[Mûmo une nâlyândîle ukugela ukupilikisya ku buyo kûko une nâli, une ndinkwanda ukusyagania ukuti kukâlîko nayumo mmayolo na kilabo kula. Nayumo

abonekága ukuya nkatale. Bo ikilündilo kya bakinda bamogi abakikùlu abekeke une ngètilèmo siku bāsopága ingōngi syābo ukusyūngutila une, une ndinkwāga kwāliko lwēne lu lulagano ulukulumba ulu lwānjefukilaga une kangi nakumo ukunyonywa kwambili bo mu kayilo ka bündu. Une nākètesisye abakikùlu abatubwa aba bōsa bāfwēle inywīli syābo ukusuluka ku misana gyābo kangi i sketi syābo syabūkàga pāsi ku njayo syābo.]

[Ukufuma pa iki, Hope, unkasi gwangu ugwakwanda, alinkunyūbatila une, nukuyoba: “Nkundwe gwangu umpala!” Polelo uyūngi unkikùlu untubwa alinkunyūbatila une kangi Hope alinkusanuka nu kummūbatila u nkikùlu untubwa yula. Une ndinkuti: “Une ndikupilikisya iki. Iki kyo kindukimo lōsa kikīndáne ukufuma ku lugáno lwītu. Une ndikulōnda ukugomokela ku mbili unkangale gula pa kitala.”]

[Polelo i Lisyu lilinkuyoba kwa une: “Iki kyo iki ugwe gwalumbililaga ukuti u Mbepo Mwikemo yo ali! Iki kyo lugáno ulupelelesye. Nakimo kibagīle ukwingila Kuno kisita ulwēne!”]

[Ukukōnga une nālyēgīgwe mmwanya nu kutūgasigwa pa buyo ubwa pamwanya. Mōsa ukusyūngutila une syāli mbalilo nyīngi sya banyāmbàla na bakikùlu mu bulēnge bwa butubwa. Abēne bākutága, nu buhofu: “O, unkundwe gwītu umpala, uswe tuli basangalufu fiyo ukukubona ugwe apa!” Une ndinkwinogona: “Une ndikugogwa injosi mma, kabuno une mbagile ukubabona abandu aba kangi une mbagīle ukukēta u mbili gwāngu gulāmbalēle kunyuma kula pa kitala.”]

[I Lisyu lyāyobile kwa une: “Ugwe umenye icyene kisimbígwe mu li Bāngéli ukuti abasololi bābūnganisigwe na bāndu bābo.” Une ndinkuti: “Ena une ngukumbukila ikyo mu Masimbo, loli bakayapo bingi aba a baBranham.” A Masyu galinkwāmùla: “Aba bakaya baBranham mma. Aba bo bapinduki bāko, aba ugwe gwālongosisye kwa Ntwa. Bamō mwa bakikulu aba ugwe kwinogona bali bakeke fiyo kangi bamogi bākindilepo ukukinda ifyinja malongo-mahano-na-mana akabalilo kako ugwe gwabalongosisye abene kwa Ntwa. Fyōbēne abene bikukūta panja, ‘Nkundwe gwangu umpala!’” Polelo ifilundilo filinkukūta palikimo: “Linga ugwe ukābūkīle panja ni Nongwainunu, uswe angali tukaya kuno!”]

[Une nalindalusisye: “O, ali kugu Yeso? Une ngulonda ukumbona Umwene!” Abandu balinkwāmùla: “Umwene ali itolo pamwanyapo panini. Ilisiku limo Umwene isakwisaga kwa ugwe. Ugwe gwātumigwe ukuya ndongosi, kangi akabalilo kako Kyala ikwisa,

Umwene isakukulōnga ugwe ukufwana nu bumanyisi bwāko.” Une ndinkundalusya: “Ngimba Pauli na Peteri bikufimbilisígwa ukwima u bulongi ubu bōpe?” Ilyāmulo lyāli: “Ena!” Une ndinkuti, “Une ndumbilife ifi abene bālumbilife. Une ngālyēpwikēko ukufuma ku Kyene ukubuka ku lubafu lumu pamo ulungi. Pāpo abēne balyōsisye mu Ngamu ya Yeso, une nābombīle nīne; kūko abēne bāmanyīsyē u Lōsyō mwa Mbepo Mwikemo, une nābōmbīle nīne. Kilikyosa abēne bāmanyīsyē, une nāmanyīsyē, nīne.”]

[“Uswe tumenye ikyo,” abandu balinkulila, “kangi uswe tumenye ukuti uswe tukugomokelaga ku kīsu na ugwe utubalilo tumo. Yeso isakwisa nu kukulonga ugwe ukufwana ni Lisyu ugwe ulumbilile uswe. Polelo ugwe kwisakututwāla uswe ku Mwēne, kangi twēsa palikimo uswe twisakubūkāga ukugomokela ku kīsu ukuya būmi bwilanabwila.” Une ndinkusuma: “Ngimba une ngufimbilisyā ukugomokela ku kīsu, lilino?” Abēne balyāmwīle: “Ena, lōli umulisyaga ukugutila nkyeni!”]

[Mūmo une nālyāndīle ukwēnda ukufuma ku bumogi bula, u buyo bwabuhobofu, bo mumo kubutali amaso gangu gabagile ukuketa, abandu bisaga kwa une ukunyūbātīla une, bikukuuta: “Nkundwe gwangu umpala!”]

[Mbimbibi itolo une nāgomokīle pa kitala kangi. Une ndinkuti: “O, Kyala, ndula une! Komma nasiku ukundeka une ndekelesyengeko ni Lisyu. Unko une nītūgāsye ukutalula pa Lisyu. Une ndikupāsya iki aligwēsa uyungi ikubōmba, Ntwa, unko une ngutēge nkyeni ku bumogi bula, u buyo bwabuhobofu!”]

[Une ngīndile ukupilikisyā ukukīndāpo siku mbūmi bwāngu ukuti ikyēne kisa kwēga u lugano ulupēlelēsye ukwīngīla u buyo bula. Kakālīko a kabini nakamo, nabumo ubukatale, nabumo ububine, nabumo ubukāngale, nabumo ubufwe. Bwēne bu bumogi nu buhobofu ubwapamwanya!]

[Kilikyosa iki ugwe kubomba, bika palubafu kilikyosa ikingi mpaka ugwe kulwaga u lugāno ulupelelesye! Ingilaga kuko ugwe ubagile ukugana aligwesa, yope nu ndugu aligwesa. Kali linga indege yikukusenyenda, injasi yikumwekuka, pamo indusu sya ndugu sili pa ugwe, ifindu ifi fikaya ni mbōmbo: yaga nu lugano ulupelelesye!]

[Linga ugwe ukapokigwa, itikisyā Yeso Kristi ukuya Mpoki gwako lilino! Linga ugwe ukosigwa mmisi, yaga mōsīgwe lilino! Linga ugwe ukalyāmbilīle u Lōsyō mwa Mbepo Mwikemo, ambulīla ikyene lilino! Gutilaga nkyēni ku lugano lupēlelēsye lula ulu lwīsa kukwēga ugwe ku bula

ubumogi kangi ubuyo bwabuhobofu ku mbénu kwa kisĭgo kya kabalilo!]

³⁹ Ndaga ugwe, Nkundwe, panongwa ya ikyo. Ikyo kyo . . . Une ndinkwinogona, lumo, mwe bamo ba umwe mubagile ukwisa ukubala ikylene. Kangi linga ugwe ukaya nalyo ilibuku ilinini, fiki, ugwe ubagile ukuya nalyo ilyene.

⁴⁰ Polelo ku i, kulakula kŭsi kwa lyāni, umwēne ātēndike akasomekelo akanini ukufwana nu butumigwe pala. Ngamanya ukuti kali umwe mwāketesise ikyēne pamo mma, palapala pāsi, ukufuma pāpo umwe mukubala ikyo. Palapala pasi, akīngisyēpo akanini. [Ubuyo busitakandu pa tepi—Nsimbi]

⁴¹ Lilino, ikyo kikubuka kifuki mu njobelo yiliyosa pasi pa kumwanya, umwe muketile, uku—uku ukubaligwa ukusyungutula ikisu.

⁴² Lilino, “Fiki—fiki . . .” ena, ugwe kuyoba, “ngimba ugwe ubagile ukuyoba fiki ikyo, Nkundwe Branham, bo ugwe ukāli kukwīputila ababine?”

⁴³ Iyene yo nongwa ya iki: ukuti uswe tubagile ukumanya ukuti ingelelo syitu sikaya paitolo mma. Muketile? Uswe tukufimbilisigwa ukusegelela kwa Kyala ukwisila mu nkolofwa gula ugwa lugano nu lwitiko. Lwītiko lukwēga uswe ku nkolofwa. Ulugano lo lūlo lukutwēgēla uswe nkati. (Nswaga une.) [Ubuyo busitakandu pa tepi—Nsimbi]

⁴⁴ Lilino, ngimba umwe mukwinogona ukuti Kyala abagile . . . Lilino unko uswe . . . Lilino, ulwitiko lwinu lukufika pa buyo lilino, ngimba umwe mukwinogona ukuti . . . ? Ngimba umwe mubagile ukwīnogōna fiki lilino linga syōsa mwa ngelelo isi . . . ikipānga iki kangi ikubugutula iki ikya bānda apa kibikilepo panja, kuli i Kitāngalāla kya Kyala? Balipo bīngi apa aba mususilwe a bana binu, kuli i Kitangalala kya Kyala. Balipo bīngi apa aba babūkile kisita myēnda, panongwa ya Kitangalala kya Kyala. Balipo bīngi bābo bītogile ukukīndamo mu mibelo, kangi bēndile kisita filato pa njayo syābo, ukufika ku kipanga apa, uko ko kutalusya, panongwa ya Kitangalala kya Kyala.

⁴⁵ Ngimba umwe mubagile ukwīnogonēla u mwāti ukusīngūla i kifwāni ikikulumba, ikimogi, mpaka ikyēne kyo kalyōto, kangi polelo itolo nu kukilepulania ikyēne mōsa? Pala pabagile ukuyapo ikindukimo ikisobi nu mwāti yula. Ngimba umwe mubagile ukwīnogōnela umwīmbi ikusīmba u lwīmbo mpaka ulwēne lo kalyōto, kangi polelo itolo nu kulepulania ubwāke—ubwāke ubwīmbligo lōsa? Kilipo ikindukimo kitamisye nu mwāti. Muketile? Kikayapo nakimo kisobile na Kyala. Kyala atikupela ikindu bo iki, itolo ukulasulania ikylene nukusopela ikylene panja. Ikyene kyo kya Kitangalala Kyake. Ikyene kyo kya Lwimiko Lwake.

⁴⁶ Gwēsa gwa uswe ikukina ikiyabo mu kifwani iki kangi mu lwimbo ulu. Uswe tuli fiyabo fya Kitangalala kya Kyala.

Kangi ikyo kyo, ukuti uswe tubagile ukukina ifiyabo fyitu, akabalilo kosa aka uswe tukusyagania apa uswe tuli pabuyo-na-pabuyo, yaga mbuyo ubu, kangi polelo syāla palapala pala mbuyo bula. Kangi ubuyo bumo uswe tumenye, ikyene kili mu lugano, panongwa yakuti ikyo kyo kikupela i picha.

⁴⁷ Lilino, ikyene kyo kikafu akabalilo kako ugwe kukéta imboniboni isi bo ulu, ni findu, ukupilikisya iki kyo—kyo kili ku Lubafu ulungi. Une ngunyonywa une nāmēnye. U nyāmbāla ābōmbile aka akanini akākwingisyāpo pāsi pala, ukuyoba ukuti abasololi aba iyolo, mūmo abēne bāsibwēne imboniboni isi, na fyosa bo ifyo, kangi mumo fikuti, umwisyugu, ukukindapo na iki. . . Uswe tukabagila ukupilikisya ikyēne, lōli u Ntwa atulekile uswe ukugutilamo mu kila nukukibona iki kila kili.

⁴⁸ Lilino, binangu, une ngāgonil’utulo mma. Kangi une, itolo pakati pa umwe na une, kangi i kipanga iki apa, une ngāli mu mboniboni. Une mmenye iki imboniboni yili. Bamo apa, itolo indūngu gwākīndāga, bamo, bāli itolo bu bwīngi bo kalongo-katatu kōsa, i kilo, ikyēne kyābagile ukuboneka. Umwe mubagile ukwīnogonēla u busito ubu buli pa ugwe. Kikukupela ugwe gwālūtēnde, ena.

⁴⁹ Bule līnga ugwe gwābūkile ku lukomano lumo bo ulo, kangi itolo u bumeleligwe, līnga u lukomano lwābūkile kanunu pamo mma, kyāli pa ugwe, itolo—itolo u bumeleligwe? Ugwe kufimbilisigwa ukwamula u ndumbilili gwesa, ililālūsyo lyosa, kyōsa kilikyosa. U lukomano lukubūka kanunu pamo mma, ikyēne kikulāmbalāla itolo u bumeleligwe pa ugwe, gwīmwenē. Kēta iki kila kyābagile ukubōmba kwa ugwe.

⁵⁰ Kangi balipo bamo mwa babōmbelalumo bāngu, itolo bikūlisya itolo ababūku, na fyōsa bo ifyo, bikuya bālūtende fiyo, abene bikufimbilisigwa ukubuka ku kāya, muketile, ukulambalala pāsi, bakabagila ukwisa ku kipanga ikilo kila. Mwe! O, ikyēne itolo kibībi. Ngati umwanundīndwāna-unko gwāngu, unganigwa unnini undīndwāna gwaKikristi, Loyce. Itolo—itolo mu kubūka mu lukomano, itolo fiyo. . . Ku milungu lwēle, pamo imilungu mihano-na-mibili, kingikingi bo ulo, itolo afimbilisigwāga ukulāmbalāla nkitala ku lisiku pamo mabili, muketile, kisita nabumo ubumeleligwe. Muketile? Billy, itolo ukuyābania amakadi amanāndi, kangi itolo alepulisigwe ku tupatu.

⁵¹ Lōli, muketile, u busito bōsa bukulāmbalāla pa une. Une ngufimbilisigwa ukusūbila pa umwe ukwīputila une. Muketile? Palubafu pa ikyo, abēne bikwīyobēla ukuti—ukuti amaminiti malongo mabili ga—ga kulūmbilīla, pāsi pa bupakīgwe, bukufwānikisigwa ni sala lwēle isya mbombo ngafu, ku mbili gwāko. Une ngulumbilila ukufuma ku sala ibili mpaka itatu ubusiku bumo; utubalilo tumo katatu pisiku. Muketile?

⁵² Kangi polelo ngimba bule imboniboni yimoyene? Imboniboni yimoyene yilinkupela Ntwa gwitu Yeso ukuya monywa. Uko ko kutalusya. I Bāngèli lyāyobile unkīkūlu apalamaasiisye umwenda Gwake, aalimpelile Umwene ukuya monywa. Ena, linga imboniboni yimoyene yisakumpelaga Umwene ukuya monywa, Umwene, u Mwanundumiana gwa Kyala; bule une, u ntulwanongwa apokīgwe ni lipyāna, kyo fiki syābagile ukubōmba malongo matatu ga isyēne nkilo kimokyēne? Muketile? Ikyene kyo...Linga uswe tukwīmāga itolo nu kwinozona, ikyene kyo kukinda bundu buligwesa. U mbili gwa bundu gukabagila ukwimikana nakyo ikyo. Une nguyaga mu nyumba ya basyutano ku buyobumo, loli ngwikinya untu gwangu ukulwana ni fibumba. Muketile? Ubwēne bo—ubwēne bo bōnywa ubu ugwe ukabagila. . .Ubwēne bo bōnywa bwānkāti, muketile, ubu itolo bukukugoga ugwe mōsa.

⁵³ Lilino, lōli ngimba fiki ugwe ubagile ukugutila polelo? Une mbagile ukuyoba iki. Une nguketa Nkundwe na Kalumbu Cox, pala, Rodney nu nkasi gwake, kangi kalumbu, apa, ukufuma kunyuma nkati mula, abapinduki abapya. Kilipo i Kīsu, itolo panja pala pabuyo bumo, iki linga umwe mubagile ukwinogonela itolo mminogono gīnu nukwēga ubukētelo bwa Ikyēne, Ikyēne kyo kīndu kyālwmiko ukukīndafyosa. Ikyēne kyo kyāntēngo gwa lwiyo ululilōsa ulu uswe tukubikapo pānja. Muketile?

⁵⁴ Lilino, bo ngāli ukwīputīla ababine, une mbagile ukuyoba iki:

⁵⁵ Bule linga u mwāna unnini, bo akene kakāli kakapāpīgwa, unko uswe twēge ikyo, u mwāna unnini uyu āli nu bumi mūnda mwa māma, kuli i myesi mihano-na-mina igi, kangi u mwāna unnini yula ābagile ukwinogona? Ikyene kibagile ukuyoba, “Ugwe umenye fiki? Abene bikumbula une ngwītēndekēsya ukupāpīgwa. Ena, ngimba une ngubombaga fiki panja pala? Une ngamanya nakimo lōli u buyo ubu ubu une ngwitugasya apa. Une ngwāgāmo amaka gāngu ukufuma nkati. Kangi ngwākwtīgasyāga bulebule pānja pala? Abēne bikumbūla une liliko i lisuba ili likumulika. Abēne bikumbūla une ukuti abāndu pala bikwēnda ukusyūngutila. Kangi une ngamanya nakimo lōli itolo bu buyo ubu apa. Iki kyo kyosa une mmenye, papapa apa mu—mu mbapo ya māma gwāngu. Kuno ko kūko une natwāligwe nkati. Kuno kyo kyōsa une mmenye, mo munomumo mu mbāpo iyi. Kangi abēne bikumbūla une ukuti kuliko itolo ifwāsi ukōlokana ni ifwāsi!”

⁵⁶ Ena, u mwāna unnini yula abāgile ukuya nulutende ku bufwe, ukupāpīgwa. Ngimba uko kutalusya? Akēne kikuyaga nulutende ku bufwe, panongwa yakuti akēne kakwisa mbuyo akēne katikumanya ukufwana nakimo, iki kyo kyapamwanya, maelifu-elifu ga tubalilo kyāpamwānya, kūko akēne kakwītūgāla. Akēne kakabagila ukumanya iki

ikyēne kyo kyākufwāna na fyōsa fiki, akēne kabagile ukuyoba, “Bulebule, kyo fiki une ngwākubōmbàga?” Akēne kikuyaga kālūtènde ku bufwe, uku pāpìgwa, loli uswe twe tuli nu bumi panja apa, ena, uswe twe twāli kunyuma kula akabalilo kamo, uswe tukabagila mu njila nayimo ukugomokela kula, uswe tutikulōnda ukubūka ukugomokela mūnda mwa māma kangi mma. Muketile? Umma, uswe tutikulōnda ukubōmba ikyo.

⁵⁷ Kangi iyo yo njila itolo ikyene kiyilile akabalilo kako uswe tukufwa, mwinangu. O Kyala! Muketile? Ugwe kupāpìgwa mu Buyo. Ugwe ukayamo siku Kula. Ugwe ukabagila ukupilikisya Ikyene, bo bukulumba buki Ikyene kiyilile. “Ngimba kikuyaga bulebule—bulebule ikyēne pānja Kula? Une. . .” Kangi ikīndu kyēne iki kikumbela une ukusyāgānia, pamo ugwe ukusyāgānia, ko kala akanini akapalamasye ka Būmi, ngati u mbepo ikwīsa nkati mwa mwāna nkati mwa mūnda mwa nna. Muketile? Iyene yo njila yene iyi uswe tubagile ukupilikisya kyo fiki i Kisu ikikulumba kila panja pala, akabalilo kako bukayapo nabumo ububine, kisita busulumanie, kisita bufwe, kisita ngulilo ingāngāle, umma nakimo. O, mwe!

⁵⁸ Fiki, akabalilo kāko ugwe akabalilo kamo kufika ukukilania Kula, ugwe ukabagilāmo siku ukugomokela ku buyo bo ubu, ukusita ukukīndāpo u mwāna ābagile ukulōnda ukugomokela ku lwānda lwa nna. Muketile? Ikyene kyo kikulumbapo fiyo pa Lubafu ulungi, muketile, panja Kula. Uswe tukabagila ukupilikisya Ikyene, naloliloli umma, uswe tukabagila. Fiki, mūmo umwāna unnini yula ali kumbenu kwa kwīnogōna kulikōsa, momūmo uswe tuli kumbenu kukupilikisya kulikōsa isya iki kila kisakuyaga pānja Kula, muketile, panongwa yakuti uswe tuli mūnda mwa kīsu, twītēdekīsyē ukupapigwa akabalilo kamo, mu Kitāngalāla ikipyā, mu Kīsu ikipyā.

⁵⁹ Kangi iyo yo njila iyi une ngwipilikila ukufwana ni mboniboni sila ni findu bo ifyo, pamo fikuti kilikyosa iki kyābonīke kwa une ilisiku lila akabalilo kāko une nālobwīke kwīsīlya, itolo panja, nukukeeta iki Kila kyaali, kangi polelo ukugomokela nkati muno.

⁶⁰ Ngimba umwe mubagile ukwinogonela ukuya mwāna kangī—kangī gwāli nu—nu bumanyi iki, mūmo kyāyilile kyalwīmīko iki kyāli ukwēnda ukusyungutila, ukukēta imipiki gikumela, i njuni sikwīmba, i lisuba likwāka, kangī u būmi bo ulu, kangī polelo ukufimbilisigwa ukufūngigwa mūnda? Fiki, ugwe ukabagila ukulōnda ukugomokela, na panandi.

⁶¹ Ena, polelo, uswe, ubwītu—ubwītu ubwīnogonelo bubagile ukuya busililike, busyūmbutikila mmwanya, pamo gela ukwīnogōna isya iki kili kili ukukilania Kula. Akabalilo kako, i Lisimbo likuti, “Ikisige kikaketa, imbulukutu yikapilika, pamo lumo kīngilēmo siku mu ndumbula ya mūndu iki Kyala ali nakyō ku bēne, mbukyūngilo, aba bānganile Umwēne.”

Muketile? Polelo uswe tumenye ukuti ikyene kyo kyalwimiko pa Lubafu ulungi. Ilisiku limo, ubufwe, iki uswe tukukōléla bufwe, isakutupa uswe u Bupāpígwe ubupya, kangi uswe twisakwisaga mu Kisu ikingi, pa Lubafu ulungi.

⁶² Nkundwe George, ugwe utisakuya nkāngàle, undemali ukusyūngutíla, ukukilania Kula. Kangi Nkundwe na Kalumbu Spencer, kangi bamo ngati bamo mwa uswe bakusipo, na fyosa bo ifyo, kangi uswe twisakuyaga bakeke kula kwabwílanabwila.

Ugu gwaiyo'...ugu unselekesye gwa nyōfu
 une nīsa kusatusya, nu kufyūka
 Nu kukola i kyabupōnjōli kyabwílanabwila,
 Nu kuywēga, bo ngukīnda mu mbepo,
 “Kulagana, kulagana, isala innoge iya
 lwīpúto!”

⁶³ Ikyēne kyo kimalike, polelo. Kangi mma ikilo indali isya kwīpūta, kangi mma. Itolo ingilaga mu ngulilo ya butubwa, iyabuhobofu ukuya Kula, komma ku kyinja kimo itolo, pamo malongo mahano, pamo ifyinja elifu-elifu, loli uswe twāli Kula ifyinja i billioni mia yumo, uswe tutisa kuya twāndile na panandi. Ikyo kyo ikyene. Popāpo nongwa ya fiki uswe tutikufimbilisígwa ukuya bahobofu ulubunju ulu? Nongwa ya fiki uswe tutikusangaluka? Nongwa ya fiki uswe tulingēgāga ulusako lwa kilikyōsa ikīndu ikikulumba Kyala atupele uswe?

⁶⁴ Apa lulipo ulubumbulusyo Lwakyala. Nongwa ya fiki Yeso āng'wāлага; ukuswanyulania ikifwāni lōsa, ikuyoba, “Kikayako ni kindu nakimo ku kyene?” Umwēne ikung'wala umbili Gwāke pāsi pala, imbāmo silinkunāngīsya mōsa, ukuti, “Ni fulale Syāke uswe twabumbulusígwe.” Unko uswe tungalepulanía ikipīcha mosa, ulubunju ulu. Unko uswe tūbatile Ikyēne, ukwītíkísyá Ikyēne.

⁶⁵ Lilino, nkundwe, kangi aligwesa gwa umwe lilino uyu ikuyaga pakwīputilígwa, linga umwe itolo mukwisa kwima ukusyungutíla i kigemo. Akabalilo kāko i ndumi yābūkile panja, utubalilo tunāndi pabutasi, ukwisila mu kusanusya kangi mu ndimi, ukuti uswe tubagile ukubika amaboko pa babine nukuketa imbombo isyamaka sya Kyala.

⁶⁶ Lilino, nkundwe gwitu, ugwe utikufimbilisígwa ukwima mmwanya, nkundwe, pala ulāmbalèle pa kitala. Uswe tukwisaga kwa ugwe.

⁶⁷ Loli linga balipo balibosa abangi apa ukwiputíllígwa, kulōnda ukwima ukusyungutíla ikigemo, akabalilo kako nkundwe na une tukwiputa kangi tukubika amaboko pa babine, ugwe isaga itolo kunokuno lilino. Kangi kumbukilaga, ūbatíla ikibonekelo kila, “Ni fulale Syāke uswe twābūmbulusígwe.”

⁶⁸ “Une ndikukupilikísyá ikyēne, Ntwa.” Naloli, ugwe utikubōmba. Ugwe ukāli uli mūnda mwa kīsu tāsi.

⁶⁹ Lōli Umwēne ātēndīke itēndekésyo sila. Kangi Umwēne akābagīle ukwēga...Nongwa ya fiki Umwēne āng'wāligwe? Itolo ukulepulania i kifwāno lōsa, pamo ukulepulania u lwimbo mōsa, ukutāgila ikyēne pānja? Umma, nkulumba. Umwēne āng'wāligwe, afulasīgwe, nu kusulul'illioipa, ukuti uswe tubagīle ukubumbulusīgwa. Kangi ukwīsila mu ikyo, uswe, “Isyāke ifulale, uswe tubūmbulusīgwe,” aligwēsa yumo gwa uswe. Lilino, akabalilo kako umwe mukwisa, ukubungania ukusyungutila ikigemo ku lwiputo.

⁷⁰ Lilino, bingi ba iki apa ikyapamwanya-mwanya ikya busasanionongwa bwa kiMerika, nu kuyoba isyakuti, “Ugwe kufimbilisigwa ukubomba *iki*, ukubomba *ikyo*.”

⁷¹ Kilipo ikindu kimokyene une ngulonda ukuya gwabwanaloli-ndumbula na ugwe, mwinangu. I kīndu, mūmo Kyala ikubūmbulusya, kyo pa lwālo lwa bubōmbèlo ku Mwēne. Muketile? Ikyēne kyo pa lwālo lwa bubōmbèlo ku Mwēne. Uswe tukufimbilisigwa ukwitikisya ububumbulusyo bwitu pa lwalo, lwa, uswe tukumbobelaga Umwene ukufuma papo uswe tubumbulusigwe. Lilino, ili Bangeli lyātīle, “Lataga isobelo syinu, yumo ku nnine. Iputila yumo ku yungi, ukuti ugwe ubagile ukuya mbumbulusigwe.” Muketile? Ulwene lo pa lwālo, ugwe kumbobelaga Kyala. Mwe bingi ba umwe apa, lumo, muli nkayīlo ka kufwa, kangi umwe—umwe mukufimbilisigwa ukufwa linga ikindukimo kitikwisa pa buyo. Polelo une ngulonda ugwe, mu ndumbula yako...

⁷² Lilino, uswe tubagile ukōneléla ugwe na mafuta, uswe tubagīle ukusuma pamwanya pa ugwe, ntimi na une, ukwiputa ulwiputo ulwa lwitiko, ukubōmba filifyosa ifi uswe tubagile, loli ikyene kitisakubomba nakanunu nakamo mpaka ugwe gwimwene gwingilege mbulīlanisi na Kristi. Muketile? Ugwe kufimbilisigwa ukwisa ku bulīlanisi bula, ukuti, “Une, Ntwa...”

⁷³ Une nguketa u—u—u nkikulu unkeke ikwenda pamwanya pala itolo lilino. Umwēne īsile kuno, pakaya patali mma ku nyumba yāngu, ni kindukimo ngati lyūlu, pamo imbungo ya Hodgkin. Kangi umwene yo gwa Methodistī, nu lwitiko. Une ngwitika ikyo kyo kutalusya, bule ikyene, kalumbu? Kangi umwēne āli nu bwīsūle ubunywāmu mu lubafu. Kangi lilino pala umwēne ikwīma, abūmbulusigwe.

⁷⁴ Une ngumbona Kalumba Weaver imīle apa, āli yumo gwa itolo bubībi bwa bāndu ba kansa uyu une ngētīlēmō siku, mbūmi bwāngu bōsa. Kangi ikindu kyakwanda une nalindalusisye umwene, ukuti umwene ikosigwaga mu Ngamu ya Yeso Kristi nukulāta imbibi syake. Akabalilo kāko une nālyēgīle umwēne mmīsī aga apa, une nāfīmbilisigwāga ukunkolelēla umwēne; umwēne āli nsekele fiyo, ingōngi syāke, itolo utūndu utunini utunāndi. Kangi umwene alyosisigwe mu Ngamu ya Yeso Kristi.

Kangi ikyo kyo pabunini fiyo kikindile ifyinja kalongo ifi fikindilepo, bule, kalumbu? [Kalumbu Weaver ikuyoba, “Umma. Ikyo kyo kili ni fiyinja kalongo-na-ntāndatu ifi fikindile.”—Nsimbi] Ifyinja kalongo-na-ntāndatu ifi fikindilepo. Ifyinja kalongo na ntāndatu ifya būmi ubupayigwe, panongwa yakuti umwēne āli gwākwigāna ukwisa mu bupilikilo. Akabalilo kāko ba banunu-ukukīnda ba bagānga ukusyūngutila kuno. . .

⁷⁵ Fiki, u ngānga gwāke mwēne ālimbūlile une. Akabalilo kāko, une nālimbūlile umwēne—nālimbūlile umwēne, ndinkuti, “Umwēne abūmbulusigwe.”

⁷⁶ Alinkuti, “O, o! Umwene isakufwa na kansa, mmilungu minandi. Komma ukupasya isya ikyo. Umwene isakuyaga akīndile. Imilungu iminandi igi gikīndile, umwēne isakubūkāga.” Kangi umwēne ātalile itolo ukumpa umwēne kifuki lisiku limo ukuya mūmi. Kangi apa umwene alipo, umwisyugu, bo fikindilepo ifyinja kalongo na ntāndatu, imile pa kigemo. Fyo fīngipo filiku mbagile une ukuyoba, ukwāndisya nu ukwāndisya, kangi ukwāndisya nu kwāndisya!

⁷⁷ Lilino, Kyala itolo atikubomba ikyo pa yumo mwa bana Bake, kangi atikubomba ikylene ku bana abangi. Umwene ikubomba ikylene ku bana Bake bosa. “Aligwesa uyu iganile abagile ukwisa.” Ikyene kyo. . . Ugwe ubilikiligwe ku Mwene. Lilino, “Ulwiputo lwa lwitiko lukupoka ababine.” Ilibangeli liyobile ikyo.

⁷⁸ Lilino—lilino, linga. . . ifi une ngulonda ugwe ubombe, ko kufumusya ubusobi bwako kwa Kyala, nu kuyoba, “Gwentwa, mbumbulusya une.” Linga ugwe ukāpindwike siku, paga indumbula yāko kwa Kristi. Kangi linga ugwe ukōsigwamo siku, mmisi, mu Ngamu ya Yeso Kristi, kilipo ikitubwi kitendekesigwe. Muketile?

⁷⁹ Kangi u nkikulu unnini uyu ukukilania u lukindi apa; akabalilo kāko u nkānakyala yula āpindusigwe ni kyēne. Akabalilo kako umwene ālambalēle. . . Abene balinkutuma umwene ku kāya ukufuma ku Silvercrest, na TB, ikufwa. Kangi akabalilo kako une nsulukege kula, kangi u Ntwa apele imboniboni, alinkuti, “Umwene isakubumbulusigwaga.”

⁸⁰ Kangi umwēne ālinyāgile une kula, ulubūnju ulukōnge, Tāta Andrews, kangi itolo alinkūnyūgila une lōsa. Alinkuti, “Ulusūbilo lusyōbi bo ulo, pa nkīkūlu yula!”

⁸¹ Une ndinkuti, “Tata Andrews, ikyēne kikaya lusūbilo ulusyōbi. Unkikulu yo Nkristi. Kangi akabalilo kako umwene ikufika kukubagila, umwene ikwisa kukosigwa.”

⁸² Kangi umwene alinkuti, “Umwene ikufwa.” Alinkuti, “Une. . . Umwene abagile bulebule ukutumigwa ukufuma ku kāya ukufuma ku Silvercrest?”

⁸³ Une ndinkuti, “Nkulumba, ugwe kuketa, ugwe uli. . . Iki ugwe kuketela, ugwe kuketa ku iki u dokotala ikuyoba. Une nguketa iki Kyala ayobile.” Muketile?

⁸⁴ Lilino, ukwene ko itolo ukukindana, iki ugwe kuketela. Muketile? Ugwe kuketa iki u dokotala ikuyoba, ugwe naloliloli gwisakufwa. Lōli ugwe kufimbilisigwa ukukēta iki Kyala ayobile. Lyo lisyu lya ywāni ugwe kuyaga pakwēga?

⁸⁵ Bule linga Abraham angali egile aminogono ga dokotala isya umwēne ukuya fyīnja mia yumo mbukusi, kangi ikuyaga nu mwāna pa nkasi gwāke, malongo-mahano-na-mana? Ngimba umwene āngāli abombile fiki akabalilo kala? Muketile? Fiki, u dokotala abagile ukuyoba, “Unnyambala yula yo nsyūtāno.” Lōli Kyala ālyitikisye ku mwēne ukuya bugolofu, panongwa yakuti umwēne ālitīke Kyala. Muketile? Lilino, ugwe. . .

⁸⁶ Kangi u nkīkūlu ālitūgēle. Umwēne āsūlile ukōsīgwa, i Ngamu ya Yeso Kristi, panongwa yakuti une ngwinogona umwene āli mu luko lumo lwa Methodisti pamo m’Presbeteri. Umwene alinkwanda ukuya mbinepo kangi mbinepo. Kangi umwēne ikwīsa nu kummwāga Grace Weber, uyu itūgasyāga papapa, pamo, ikwītūgāla kula nalino, umwānundīndwāna gwāke ikubōmba, nselekesye, kangi isaga apa, kangi ālyōsīgwe mu Ngamu ya Yeso Kristi, ni sekema, ni mbūngo ya mūlu gapufwīke mōsa ukukilania ifibega fyāke na filifyōsa, ni sekema, mia yumo na mana. Kangi ālyōsīgwe papapa apa, mu Ngamu ya Yeso Kristi. Kangi umwene mumi itolo ukukilania ulukindi ukufuma apa. Lumo itugele apa lilino. Ngelengenie ukuketa linga une mbagile ukumbona umwene, amaminiti manini aga gakindilepo. Muketile? Ulupilikilo, umwe muketile.

⁸⁷ Ikyēne kikaya itolo ukubūka ukusyūtila. . . une ngukīndāna na bamo mwa bakūndwe bītu, itolo ukwāla ifiboko pa *iki*, *kila*, kangi i *kīngi*, bo lula, nu kuyoba u luko lumo lwa lwapamwanya-mwanya u lwītīko lwīsa kubōmba ikyēne. Ikyo kikaya ikyēne mma. Ugwe kufimbilisigwa ukuya nu lwanaloliloli, lwa i Bāngēli, lwītīko lwa Mbepo Mwikemo. Muketile? Ikyēne kitikubōmba, ikyēne kitisakukīndilila. Ikyēne kikaya kyākukīndilila.

⁸⁸ Iyo yo nongwa une mbagile ukupālisya Ntwa ukuti Umwene andulile une mpaka nalino. I–i–i būmbulusyo isi sibonike pa buyo siyīle syabwanaloli, panongwa yakuti abēne bo babwanaloliloli bāyēngīle pa ISI SYO IKUTI U NTWA. Muketile? Polelo abēne bisakwīma.

⁸⁹ Lilino–lilino, ukuya sukulu ya Ndungu innini, une nagūlilaga itolo i miniti, nguyoba kwa umwe, mpaka abene bali nu buyo bwabo, pabuyo-na-pabuyo, ukuti uswe tubagile ukuya kimyemye lilino. Uswe itolo tulinago amaminiti mabili, uswe twisakwiputa, ukwanda ukwiputa.

⁹⁰ Lilino, une ngulonda aligwesa gwa umwe ukwilata ubusobi bwinu kwa Kyala, nu kufinga kwa Kyala ukuti ugwe kumbombelaga Umwene nu kubomba kilikyosa iki ugwe ubagile. Kangi ntimi na une tukuyaga pakwīpūta, nu kwīsa ukubīka amaboko pa umwe, kangi umwe musisimikīsyē ukuya babumbuluke linga umwe mukwitika ikyēne.

⁹¹ Bābagīle bulebule abāndu bala pa ngīli-sya-balemale, na bāmapuli, na bākinūnu, na bafwamaso, pa Ndungu gukīndīle pamūsi, itolo bālyēndīle ukufyūka ku kigemo, ukutāgila uko ingīli-sya-bulemale syābo; ukwenda ukufyuka ku kigemo, amaso gikwisa gikwīguka, umwe mumenye, bo lula? Abamia ukubāsania na bamia ba abene! Mpaka, une nāli fīyo mōnywa, abēne kifuki bāli na une mbīmbigwe ukufuma pa buyo, itolo nīmīle, abēne bikukīsānia. Muketile? U lukīndi ulu lwābagīle ukufikila ukufuma kuno mpaka i Sukulu ya Sekondale ya Jeffersonville, kifuki, bagolisigwe mōsa, ukwīsa ukukīndāmo mu lukīndi. Kangi une ngamanya linga alipo yumo gwa bēne, akīsenie ukukīndāmo, lōli iki kyābumbulusīgwe. Muketile? Panongwa yakuti abene bikwisa pa lwalo lwa lwitiko ulwabwanaloli, ulwabwanaloli ulwītiko lwa Kikristi kangi bikwitika. Abene. . . Ikyene kikufimbilisigwa ukuboneka.

Lilino inamisya imitu gyinu, aligwesa, ndula une ukwīpūtila abēne.

⁹² Ntwa Yeso, uswe tukutwala kwa Ugwe, ulubunju ulu, ikilūndilo iki kīmīle apa, kikugūlila, ikya babine, abāmbula, abāna abalūmbusīgwe. Abēne bakīndilepo pa lusūbilo lulilōsa, bīngi ba bēne, Ntwa, ubwa bubūmbulusye bwa bagānga, fiyofiyō u nyāmbāla uyu alāmbalēle apa pa kitala iki. Ikyēne kyo pamo i lipyāna Lyāko pamo umwēne ikwīsa pānja pa kīsu mmasiku amanini. Kangi kisita kwilamwa, balipo bamo bīmīle pa kigemo apa, nu kutikigwa kwa ndumbula kukugūlila abēne, kangi imbūngo, nu nyāmbūlo isi sibagile ukuswānyulania abēne ukupāgūlania.

⁹³ Kilipo ikindu kimokyene, Tāta, ikyo kibagīle ukupoka abēne, ikyo kyo, kubuka ukukinda i mbilikanilo ihano apa isya mbili ugu, kūko abagānga bāgelīle nulwītiko, kisita kwīlāmwa, ukupoka ubūmi bwābo; imbungo, kansa, TB, lutamio lwa ndumbula. Kangi na fyōsa i fimyātiko, nu tupīpa, ni findu, kangi—kangi—kangi imikota gyākulwāna-ni-mbani, u ndugu ikwībūngānia palapala pamwanya nkati, ukwēga u būmi bwābo.

⁹⁴ Kangi une njobile, Ntwa, une ngwitika, aminogono Gako, ku bene. Kangi une mbilike u nnyambala yula ikuyoba mu ndimi ulubunju ulu, kangi āpele u lusanusyo lula, iki kikubonekaga umwisyugu. Bamo mwa bene bikukwambililaga ikyene, Ntwa, naloliloli. Uko ko kotalusya. Une ngwitika ikyene.

⁹⁵ Kangi lilino, bo kusīmbigwe mu i Bāngēli, ukuti Davidi, u ndumiana unnini untimi, akētesyāga ing'osi sya gwise, pānja

kunyuma ku lulangalanga. Kangi ilisiku limo i ngalamu yālisile mula nu kwēga kamo mwa bakang’osi ba gwīse, nu kubopa ukusōkapo na kēne. Kangi u ndumiana unnini u ntimi, nu lwītiko, ngimba āli na fiki umwēne ukwisa ukulwana ni ngalamu iyi? Komma indusu ya mwīsyūgu pamo indusu. Lōli umwēne āli na kafyāta kanini, kangi umwēne ābūkīle ukukōnga i ngalamu yila. Umwēne alinkugoga ingalamu yila, nukutwāla ing’osi yila ukugomokela. I kīndīngo kikwīsa nkati nu kwēga yimo; umwēne alinkubūka ukukōngēsya i kīndīngo kila iki kyābagile ukumbongotola umwēne ku kīsu. Lōli umwēne akālīnogwīne isya bunywāmu bwa kīndīngo, pamo a maka ga ngalamu, pamo ubwēngo bwāke, pamo ubusitakubagila kwa fyāta yila.

⁹⁶ Loli akabalilo kako umwene imege pankyeni pa Sauli u mwalafyale, umwene alinkuti, “U mbombi gwāko ātīmāga ing’osi sya gwīse, kangi i ngalamu yikwīsa nu kwēga yimo, nu kubopēla pānja. Kangi une ndinkunkongesya umwene nukuntwala ing’osi ukugomokesya.” Umwēne alinkuti, “U Kyala yulayula uyu ālimbāngīle une ukufuma ku kiboko kila, ifyāla fya kīndīngo, pamo ifilega fya ngalamu yila, abagile kangi ukwēga uyu unsitakubūtīgwa u Filisti nu kumpapo umwēne mu kiboko kyāngu.”

⁹⁷ Mūmo uswe tumenye akapāngo kakubūka, ukuti umwēne nalōli āgogile; āgogile u nyāmbāla uyu āli kīngi, kingi kōsa nywāmupo ukukīnda umwēne āli, kangi u gwābwite. Mūmo ikyēne kyālīnswīgīsye Sauli, u mwālafyāle unkulumba yula, u nyāmbāla gwāmaka, mūmo fikuti u ndumiana unnini yula ābagile ukuya nu lwītiko mu fyaata. Umma, komma mu fyaata, lōli mwa Kyala.

⁹⁸ Lilino, Ntwa, nimile ukusyungutila ikigemo iki, kibikigwe apa pa kitala iki, yo ng’osi ya Kyala, tung’osi utunini, mumo ikyene kyayilile, ku Mwene. Abēne bakōlīgwe lōsa ni ngalamu yikukōleligwa kansa, i kīndīngo kikōleligwa TB, imbūngo isīngi isi syo sibakolile abēne, nu kubayugania abēne pānja, nu kubalepulania ku tupatu. Ntwa, une—une ngufikōnga ifyēne, na kafyāta akanini kakukōleligwa lwīpūto lwa lwītiko. Ikyene kikaya kīnywamu fiyo mma, loli une mmenye iki ikyene kibobile. Kangi une mmenye ikyene kikāli yo Kyala yulayula. Une ngwīsa ukukōngēsya ifyēne, ulubūnju ulu, ukubatwāla abēne ukugomokesya, Ntwa, ku ndeka sya nkipepo isyambindimbīndi isya bukafu bununu, ukusuluka kifuki amīsi amalūlāle ga lutēngāno, kangi ukusōkākō ku sulumanie syābo, ukwītika pa Ugwe.

⁹⁹ Kangi une ngubūka ukukōnga abēne, ni kilwīlo iki Ugwe gwāpēle ukubūka nkati. “Ulwiputo lwa lwitiko lukupoka ababine, kangi Kyala isakubasumusyaga abene. Linga abēne bābōmbīle ubutulwanongwa bulibōsa, ubwēne bwisakuhobokeligwāga abēne.”

¹⁰⁰ Kangi, Tāta, uswe tukubūka lilino ukwākwāgāna nu ndugu, ukwākwāgāna ni ngalamu, ukwāgana u—u mōhési pa luko lulilōsa ulu umwēne alimo, akōlelígwe kansa, TB, imbūngo ya Hodgkin, ulutamio lwa ndūmbula, yiliyōsa imbūngo iyīngi. Uswe tukwisa ukummwaga umwene, kangi ukuntwala kang'osi uyu ukugomokela ku Nyumba ya Kyala kangi. Mu Ngamu ya Yeso Kristi uswe tukubūka, ukwākubōmbēla i fyāta iyi yīyo Ugwe utupèle uswe. Yaga na uswe, Tata, akabalilo kako uswe nuligindiko tukusegelēla kwa Ugwe lilino, mu Ngamu ya Yeso.

¹⁰¹ Une ngulonda umwe mūmilisye imitu gyinu ginamisigwe. Kangi uswe tukwisa ukōnelēla na mafuta, nu kubika amaboko pa babine, kangi u lwīpúto lwa lwītíko lwisakupoka ababine. Nkristi aligwesa nkati muno, bika ulwitiko lwako ku lukindi lwa lwiputo ulu.

[Ulukindi lwa lwiputo lukumalika pa maminiti matatu na sinda, mingi mwa masyu ga Nkundwe Branham go masitakupilikisigwa—Nsimbi]

Mu Ngamu ya Yeso Kristi!

Mu Ngamu ya Yeso Kristi!

I Ngamu ya Yeso!

I Ngamu ya Yeso Kristi!

I Ngamu ya Yeso!

Tāta, une ngukemela u mōhési! . . . ? . . .

Mu Ngamu ya Yeso Kristi!

Mu Ngamu ya Yeso Kristi! . . . ? . . .

Mu Ngamu ya Yeso Kristi!

Isaga kangi itika ikyene . . . ? . . . kangi ikyene kisakubombigwa! . . . ? . . .

Ntwa, Ugwe . . . ? . . .

Kyala . . . ? . . .

¹⁰² Ntwa, Ugwe uli . . . Ugwe gwāsimbile u lusako. Ugwe gwe Nkamu, Kristi! . . . ? . . . Mu Ngamu ya Yeso Kristi!

¹⁰³ “Ulwiwiputo ulwa lwitiko lukupoka ababine.” Une ngulonda Ugwe ubombe ikyene ku mwene. Ntwala umwene agomokele ku nkikulu unkafu! . . . ? . . .

I Ngamu ya Yeso Kristi, ntwala umwene ukugomokela!

Mu Ngamu ya Yeso Kristi, ntwala umwene ukugomokela! . . . ? . . .

Mu Ngamu ya Yeso Kristi, ukutwala u kalumbu gwangu ukugomokela.

Mu Ngamu ya Yeso Kristi, ukutwala kangi u nkundwe gwangu! . . . ? . . .

Mu Ngamu ya Yeso Kristi! . . . ? . . .

Mu Ngamu ya Yeso Kristi! . . . ? . . .

Mu Ngamu ya Yeso Kristi! . . . ? . . .

Ugwe ukābombilemo siku. U Ntwa akusaye ugwe!

Une ngukibopesya icyene, ulubunju ulu! . . . ? . . .

¹⁰⁴ Mu Ngamu ya Yeso Kristi, une ngukutwala ugwe ukugomokela, nu lwīpúto lwa lwítíko, ukufuma mbupinyígwa! . . . ? . . . Uswe tukōngeléla u lwítíko lwítu ku ifi . . . ? . . .

Itika itolo;

Ni mitu gyitu ginamisigwe lilino. Lilino:

Itika itolo, itika itolo,

. . . ifindu fibagile, itika itolo.

O Ntwa, une ngwitika, O Ntwa, une ngwitika,

Fyosa ifindu fibagile . . .

Unko uswe itolo tufyūsyé amaboko gītu lilino.


. . . Ntwa, une ngwitika;

O Ntwa, une ngwitika; Ntwa, une ngwitika,

Fyosa ifindu fibagile, Ntwa, une ngwitika.

¹⁰⁵ Gwítu Tāta Gwākumwànya, bala bābo bābagile ukusumuka, bāfyūsisye amaboko gābo, ukuti abēne bālítikisye icyēne. Uyu nkundwe uyu ālambalalága pa kitala, āfyūkile mmwanya, ukunāngísya ukuti umwēne ālitikisye ulubūmbuluso lwāke. Uswe tukwítika, Ntwa, abēne bo nulutēngàno bikwēnda ukugomokela lilino ku ndeka syafipèpo isyambindimbindi, mula mmīsi amalūlāle, ukuya kanunu kangī, ukwisila mu Ngamu ya Yeso. Uswe tukukupa Ugwe ukupālisya panongwa ya icyene. Ameni.

¹⁰⁶ Umma ndaga, Nkundwe Neville, une ngwitugasyaga apa nukupilikisya ugwe kulumbilila lilino.

¹⁰⁷ [Pabutasi mu bulūmbilili ubu Nkundwe Branham āsōswile a “kasomeke akanini” aka Nkundwe Thomas R. Nickel, u Nsimbi gwa i Lisyu lya Banyāmbàla Banongwainunu Yōsa, kābikigwe pa lyāni ilya kapango, aka kakuyoba iki: “UKUFWANA NI KIFWANI PA KIKINGO KYAPANKYENI: Mu Masiku ga i Bāngèli, bālipo abanyāmbàla ba Kyala aba bāli basololi kangī bakēti. Lōli mu bōsa u Busimbe Ubwīkēmo, nayumo gwa aba āli nu butumigwe ubukulumbapo ukukīnda bula ubwa William Branham, u nsololi kangī nkēti gwa Kyala, yūyo ikifwāni kyāke kikuboneka pa kikīngo icyāpanyeni ikya busōsyé ubu bwa Lisyu lya Banyāmbàla Banongwainunu Yōsa. Branham abōmbelíge na Kyala, mu Ngamu ya Yeso, ukusyusya abafwe!”—Nsimbi] 

61-0305 Kūmbènu Kwa Kisigo Kya Kabalilo
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimíngi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org